



**O**doacer Herulorum & Thuringorum princeps fuit. Illi autem erant Athilæ exercitus reliquie, qui cum Athilæ filijs ab Ostrogothorum & Gepidarum regibus uicti circa Danubiū aliquandiu quieuerant. Erat Odoacer uir rebus agēdis fortissimus, & magna prudentia præditus. Itaque suæ genti author extitit, ut denuò Italiam armata manu intrarent. Prætextus his repetendę Italię fuit, quod dicerēt Athilam, qui eam subegisset, essetq; breuē Roma potiturus, unius senis impostoris suasu, uelut pharmaco alienatum, pulcherrimam uictoriam abiecit. Itaq; in morem turbinis præcipiti ductu Italiam inuadunt. Verū Aquilegia ad læuam reli-

cta, per Taruifinos & Vicentinos in Brixianum agrum populabundi irrupunt, anno Christi quadringentesimo octuagesimo. Obiecit Augustulus, qui tum in Occidente rebus præerat, Orestem patrem suum cum exercitu. Is cum Romanorum legionibus & accuratissimo Italię delectu circa Laudem Pompeiam in Germanorum conspectu castra fecit. Inde ad pugnam prouocatus, quum aciem instrueret, subita Italorum defectione prælio abstinuit. Præsenti bus igitur uiribus diffusus cum Romanis legionibus Ticinum contendit.